

hin und wider ergangen, das sie grofsen ufsatz erfahren. Die
statt Speuer sollt von bischof Waldram, war ain graf von
Veldenz, verraten und eingenommen sein worden. Das ward
durch ain botten fürkommen, der hett ongeferd die prattik
5 und anschleg vernommen. Do lief er so schnell in die statt,
das er gleich under den thoren umbfiel und dodt war. Die-
weil er aber nit mer reden kund, so zaicht er im hinsterben
uf den deschen, darin die brief. Dardurch kam die pratik
an tag und ward die statt erhalten. Disem botten ist ain
10 ewiger jartag zum Prediger daselbs gestift worden uf den
tag Severi, als die statt sollt eingenomen sein worden, und
muß disem botten ain ganzer rat in signum gratitudinis
jerlichs uf sollichen tag zu opfer gen. Den tag darvor last
man durch die statt usrufen: »Morgen wurt der tag, an
15 dem Speur verraten ward.« Mit sollichen prattiken ist man
auch mit Basel umgangen, daher noch die stundglock da-
selbst zu ewiger gedechtnus alle mal ain stund speter schlecht,
dann es an der sonnen oder an der zeit ist. *

[A97a] **Wie herr Wörnher freiherr von Zimbern spenn**
20 **mit Mösskirch der stat gehabt, auch wie er volgendts**
in guotem alter zu Messkirch gestorben und alda be-
graben worden.

Herr Wörnher freiherr von Zimbern hat vil jar spenn
und irthumb mit der stat Mösskirch gehabt, dann er dafür
25 achten, seitmals die stat sampt der ganzen herrschaft frei
und sein aigen, so mögte er dieselbig mit steüren, fron und
andern diensten nach seinem gefallen brauchen, nutzen und
niefsen. Er wolt auch nit gestaten, das sich die burger, es
wer mit leib oder gut, von Mösskirch one sein vorwissen
30 verendern, anderswa sich niederlassen oder ire kinder aufsert-
halb der herrschaft setzen und beraten mögten; zu dem,
das sie ire güeter, es weren äcker oder wisen, one sein
bewilligen nit angreifen, versetzen, verpfenden oder verkaufen
solten, aus solchen und andern ursachen mer, deren herr
35 Wörnher achtet befuegt zu sein. Aber die burgerschaft
vermaint, inen unpillich, wider recht, auch ire alte gepreuch
beschehe. Ain mergliche ungehorsame ervolgt, derhalben,

*

2 von bischof] hs. und bischof. 19 A97a] A96b ist leer.